

四庫全書

集部

欽定四庫全書

集部
須溪集卷八

詳校官庶吉士臣張溥

主事臣呂雲棟覆勘

謄錄貢生臣湯逢泰

欽定四庫全書

須溪集卷八

宋 劉辰翁 撰

詞

望江南

晚晴

朝朝暮暮雲雨定何如花日穿牕梅小小雪風灑雨柳疎疎人唱晚晴初

前調

元宵

春悄悄春雨不須晴天未
知燈有禁人間轉似月無

情村市學簫聲

前調

秋日
即景

梧桐子看到月西樓
醋醖橙黃分蟹殼
麝香荷葉剥雞頭
人在御街遊

梧桐子人在御街遊
鳳宿雲綃金縷帶
龍池翠帳玉香毬
宮女後庭秋

雙調望江南

賦所
見

長欲語欲語又蹉跎
已是厭聽夷甫頌
不堪重省越人

歌辜負水雲多 羞拂拂懊惱自摩挲殘燭不教人徑
去斷雲時有淚相和恨恨欲如何

前調

壽謝
壽朋

前之夕織女渡河邊天上一朝元五日人間小住亦千
年相合降神僊 當富貴掩鼻正高眠欲語會稽仍小
待不知文舉更堪憐蔗境在頑堅

前調

壽趙
松廬

添一歲減一歲愁眉苦待一生婚嫁了更須采藥十年

遲婚嫁已隨時 東家者俎豆伴兒嬉幸自少年場屋
了誰能掬浙數還炊千歲是靈龜

前調

胡盤居
生日

盤之所春蝶舞晴萱溪傍野梅根種玉墻圍脩竹筍生
鞭深院待回僊 嘉熙好四十二年前猶記五星丁卯
聚更遲幾歲甲申連快活共千年

丁酉生
奎其名

前調

壽王
秋水

齊眉舉綵侍紫霞卮天上九朝鳧冉冉尊前一笑玉差

差人唱自家詞 籬下菊醉把一枝枝花水乞君三十
斛秋風記我一聯詩留着晚香時

前調

壽張
粹翁

七日後重會是星前二月之間渾似此餘年何止萬三
千日擬醉華筵 歌白雪除是雪兒傳看取長生瓢屢
倒眼前橋栗木何玄自唱鵲橋仙

南鄉子

乙酉
九日

高處畧從容華水華山自不同舊日諸賢携手恨匆匆

只說明年甚處重 幾歲避遼東茅竹秋風一併空欲
望遼東何處是濛濛也似秦樓一夢中

前調

木犀花下因憶永陽宣溪與故鄉族子
門逕之盛而其人皆適在此感歎復賦

香雪碎團團便合枝頭帶露餐笑倒那人和玉屑金丹
不在僊人掌上盤 千樹碧闌千山崦朱門夢裏殘花
下主人都在此誰看天上人間一樣寒

前調

即席
紀遊

去似賞花移處處開尊亦不辭梨栗又空醅又盡方知

舊日驪駒勸客歸
歸路月相隨
兒子門生箇箇遲坐
久不知無可待堪疑
向道兒癡直是癡

浪淘沙

秋夜感懷

無葉著秋聲
涼鬢堪驚
滿城明月半窗橫
惟有老人心
似醉未曉偏醒
起舞故無成
此恨難平
正襟危坐
三更除卻故人曹孟德
更與誰爭

前調

大風作

捲海海翻杯傾動蓬萊
似嫌到處馬頭埃
雨洗御街流

到我吹向潮回 寒似雪天梅安石榴開繡衾重煖笑
爐灰料想東風還憶我昨夜歸來

前調

有感

無謂兩眉攢風雨春寒池塘小小水漫漫只為柳花無
一點忘了臨安 何許牡丹殘客倚屏看小樓面面是
春山日暮不知春去路一帶欄干

如夢令

題四美人畫

比似尋芳嬌困不是弓彎拍袞無物倚春慵三寸襪痕

新緊羞褪羞褪忽忽心情未穩

褪履

寂歷柳風斜倚錯莫夢雲難記花影為誰重一握鮫人

絲淚何事何事歷歷臉潮羞起

托腮

睡眼青陰欲午當戶小風輕暑倦近碧欄干斜影却扶

人去無緒無緒落落一襟輕舉

欠伸

落葉西風滿地獨宿瓊樓丹桂孤影抱蟾寒寄與月明

千里休寄休寄粟藥珠心碎

折桂

江城子

西湖感懷

湧金門外上船場湖山堂衆賢堂到處淒涼城角夜吹
霜誰識兩峯相對語天慘慘水茫茫月移疎影傍人
牆怕昏黃又昏黃舊日朱門四望暗飄香驛使不來春
又老南共北斷人腸

前調

春興

一年春事幾何空杏花紅海棠紅看取枝頭無語怨天
公幸自一晴晴太暖三日雨五更風山中長是憶城
中到城中望水東說盡閒情無日不匆匆昨日也同花

下飲終有恨不魯濃

前調

和默軒
初度韻

書題拂拂洞庭香
孕雲黃繁珠光
喚謫仙人除是賀知章
未老得閒閒到老
無一事和詩忙
是中曾著老人雙
送千觴樂誰妨
世上輸贏不似爛柯長
晚入耆英年最少
空結客少年場

前調

海棠花下
燒燭詞

紅歌醉袖殢闌干
夜將闌去難拚
燒蜜調蜂重照錦團

藥春到洞房深處暖方知道月宮寒
枝枝紅淚不曾乾背人彈語羞檀欲睡心情一似夢驚殘
政自朦朧花下好銀燭裏幾人看

點絳脣

瓶梅

小閣橫窓倩誰畫得梅梢遠
那回半面曾向屏間見
風雪空山懷抱無荀倩
春堪戀自羞片片更逐東風轉

前調

和訪梅

一雪蹉跎蹇驢不載吟鞭去
夜聽春雨踏雪差無苦

待得花晴總是遊人處
梅應許小橋延佇蜂蝶先成路

前調

寄情

醉裏懜騰昨宵不記歸時候
自疑中酒耿耿還依舊

恨不能言只是天相負
天知否卷中人瘦一似章臺柳

前調

和鄧中甫晚春

燕子池塘亂紅過盡鞦韆晚
絮飛欲倦正是簾初捲

睡起無情猶到天涯遠
羞勻面乍驚紅淺夢自無人見

前調

題畫

韞指春寒隴禽一片飛來雪無言可說暗啄相思結

隻影年深也作闌山別翻成拙落花時節倩子規聲絕
虹玉橫簫纖纖拍按新聲作參差重約昨夜梁伊錯

幾許閒愁品字都忘却沈吟覺一聲哀角滿院殘花落

浣溪沙

三月三日

高卧何須說打乖小籬過雨翠長街細桃定有踏青鞋
晴日又思花處所東風絕是柳情懷人間安得酒如

淮

前調

壬午
九日

身是去年人尚健
心知十日事如常
眼前杯酒是重陽
破帽簪萸携素手
長歌藉草慰寒香
兒童怪我老來狂

前調

虎溪
春日

春日春風掠鬢鬚
亂山相對擁寒爐
綵鞭金勝一時無
自縷青絲成細柳
更堆殘雪當凝酥
兒童且莫唱皇都

前調

壽陳敬之推官

身是高人欲寢冰引年可待進稀苓無憂無患也身輕
雪裏放囚天亦喜平安騎鶴到家庭今年春早為長
生

前調

闕題

十日千機可復諧郭郎感運豈仙才人間自是少行媒
直上扶搖須九萬滿前星斗共昭回又傳賈客向曾
來

前調

暮暮相望夕甫諧
針樓巧巧似身材
下頭無數老人媒
昨夜竹林那得見
朝來乾鵲是空回
人間五日後來

攤破浣溪沙

潭上
夜歸

醉裏微寒著面醒
天風不展帽歌傾
行過溪深松雪下
夜三更
白白野田鋪似月
鏐鏐沙路踏如冰
不見剡溪三百曲
一舟橫

前調

淡淡胭脂淺著梅溫柔不上避風臺若比杏桃真未識
奪銀胎 汗面拭來慵傅粉酒香濃後暗潮腮嬌嫩不
應醒似醉倩誰猜

霜天曉角

初春
即事

柳梢欲雪十里烟明減曲曲欄干轉影教人憶夜來月
家人相對說燈花還又結凍雨村村鼓鼓終不似上
元節

前調

中秋對月

烏雲汗漫濁浪翻河漢過盡千重魔障堂堂地一輪滿
秋光還又半簷聲初漏斷不管滿身花露已辦著二
更看

前調

中和齊九日

騎臺千騎有菊知何世想見登高無處淮以北是平地
老來無復味老來無復淚多謝白衣迢遞吾病矣不
能醉

前調

樓下梅一株經冬無一花春半忽開一萼梢頭出萬紅中因賦之

經年寂寞已負花前約忽向紅梅側畔開點雪有人覺
不開何似莫百梢纔一萼却問壽陽宮額兩三葉怎
能著

前調

壽吳蒙庵

臞然如竹自是天仙福小小畫堂錦樣聽人唱鶴飛曲
橙橘黃又綠蟹到新菊熟便做月三十斛飲不盡菊
潭菊

前調

壽陳敬之

朝來微雪又近長生節造就一枝清絕梅與雪怎分別
兩年心似月除是天知得手種春風千樹一顆顆待
兒摘

前調

壽張古岩

明年七十歌彩橋僊夕見說嚴君平道年年是月初一
同時同里密後今今又昔便做伏生年紀也未到塞
吃吃

前調

賀賈
叔

良宵七七又近中元日橋上老人有約後五日重來覓
嬋娟銀海出木犀新雨濕惟有延平劍氣箕斗外廣
寒逼

前調

壽蕭靜安
時歸永新

歸來把菊春甕今朝熟苦苦留君不得携孺子到汾曲
廬山真面目水清還映玉長笑歐公老嬾君且佳飲

螺綠

其子皆
燕氏

前調

壽康
臘仙

問春來未也似辛壬癸如此男兒五十又過卻孔融二
畫堂孫子子新桃如故壘不管明朝後日春滿眼是
千歲

卜算子

元宵

不是重看燈重見河邊女長是蛾兒作隊行路轉風吹
去十載廢元宵滿耳番腔鼓欲識尊前太守誰起向
尊前舞

前調

壽郡守

蚤已是三年父老依依借願與天公借幾年保我鷄豚
社治中心似佛治中心似日人祝治中千歲似翁福
似翁德

菩薩蠻

秋興

芭蕉葉上三更雨人生只合隨他去便不到天涯天涯
也是家屏山三五疊處處飛蝴蝶正是菊堪看東籬
獨自寒

前調

湖南道中

黃鸝喔喔催人起困不成眠窓似水清露不曾寒朝來
起自難家人當睡美又憶歸程幾不管濕闌干芙蓉
花自看

前調

春曉

畫梁語透簾櫳曉折桐風送楊花老細雨綠陰寒羅襟
只似單青門三里道箇箇遊芳草比似嫁來看踏青
難更難

前調

春日
山行

江波何似西湖曲
村烟相對峯南北
何處不青青
青青是漢塋
長亭芳草路
寒食誰家墓
舊日厭殘紅
人行九里松

前調

丁丑
送春

殷勤欲送春歸去
白首題將斷腸句
春去自依依
依依欲歸無處歸
天涯同是寓
握手留春住
小住碧桃枝
桃根不屬誰

前調題醉道人圖

八仙名姓當時少
汗尊牛飲同傾倒
唯有我公榮旁人
笑獨醒
多年村落走泥飲
無升斗入了玉門關
人生一醉難

好事近

中齋惠念賜詞俾壽
不勝歲寒兄弟之意

後百年間玄度自傷來
暮打破虛空無礙共乘龍
飛去
更叅末後句如何
此事未能付前遇
小橋風雪是君
詩成處

謁金門

風乍起約吳
吾同賦海棠

嬌點點困倚春光欲軟滴盡守宮難可染濃欺紅燭艷
寂寂露珠啼臉翠袖不禁風颭芳徑相逢驚笑靨日
長初睡轉

前調

和吳吾重
賦海棠

花露濕紅淚裛成珠粒比似朝陽思未得睡來添醉色
一笑嬌波滴滴再顧羞潮拂拂恨血千年明的礫千
年人共憶

前調

和吳吾
海棠韻

遊賞競看取落紅陳陳花睡不成嬌似病春寒空受盡
舊日不知繁盛欲飲如今無興恨滿東風無綠鬢東
風還自恨

長相思

喜晴
日

上元晴上元晴待得晴時坐觸屏山禽三兩聲 欲歸
城未歸城見說城中處處燈明年處處行

憶秦娥

中齊上元客殿感舊賦秦娥見屬
一讀淒然隨韻寄情不覺悲甚

燒燈節朝京道上風和雪風和雪江山如舊朝京人絕
百年短短興亡別與君猶對當時月當時月照人燭
淚照人梅髮

前調

昨和次又作收燈節未遣早見古
巖四疊又得中齊別梅遂并寫寄

驚雷節梅花冉冉消成雪消成雪一年一度為君腸絕
古人長恨中年別餘年又過新正月新正月不堪臨
鏡不堪垂髮

梅花節白頭卧起餐氈雪餐氈雪上林鴈斷上林書絕

傷心最是河梁別無人共拜天邊月天邊月一尊對
影一編殘髮

收燈節霖鈴又似鰲山雪鰲山雪今宵清絕今宵愁絕
老人似少終然別癡癡更望春三月春三月花如人
面自羞余髮

前調

為曾氏燕
脂閣歎

春如昨曉風吹透燕脂閣燕脂閣滿園芳草冷烟城郭
青山淚盡樓頭角佳人夢斷花間約花間約黃昏細

雨一枝零落

西江月

新秋
寓興

天上低昂似舊人
間兒女成狂
夜來處處試新粧
却是人間天上
不覺新涼似水
相思兩鬢如霜
夢從海底跨枯桑
閱盡銀河風浪

前調

仙憶

曾與回翁把手
自宜老子如龍
懷胎不敢問春冬
等待鞭鷹笞鳳
昨夜又遲黃石
今朝重叩鴻濛
碧桃花下

醉相逢說盡鵬遊蝶夢

前調

石奇儀嘗授吾奇門式局以
為兵法至要日持扇園自衛

玉帳傳心如鏡青龍繞指成輪塵中多少白頭人乾裏
尋壬難認 世事說來都了鬼神見也須嗔迷槎問我
是何津向道先生書困

清平樂

石榴

深紅半面一似牆頭見草樹池塘青一片獨倚闌干幾
遍 更誰絳袖朱脣火雲相對英英笑殺牡丹正午離

披不任看承

前調

壽某翁

君詞為壽絕妙孫辛婦但恨盃無露添酒空等待梅花
久喜君白首還玄人間合信天緣如此相從至此我
亦何倦餘年

歸國遙

暮春
達興

初雨歇照水綠腰裙帶熱楊花不做人情雪風流欲
過前村蝶羞成別回頭卻恨春三月

昭君怨

玩月

月出東山之上長憶御街人唱恨我不能琴有琴心
徙倚秋波平瑩漸久玉肌清冷待更下闌干起來看

浣溪沙

春日
即事

遠遠遊蜂不記家數行新柳自啼鴉尋思舊事即天涯
睡起有情和畫捲燕歸無語傍人斜晚風吹落小瓶
花

前調

感別

點點疎林欲雪天竹籬斜閉自清研為伊憔悴得人憐
欲與那人携素手粉香和淚落君前相逢恨恨總無
言

減字木蘭花

玩月答蒙
庵和詞

何須剪紙依舊一團圓照水莫倚空寒柳下池邊也只
般君何忽忽宇宙人生都是客月在雲端人自愁人
不解看

蒙庵詞有忽忽
早睡語併及之

前調

甲午九日
牛山作

舊遊山路落在秋陰最深處風雨重陽無蝶無花更斷腸
天知老矣莫累門生與兒子不用登高高處風吹帽不牢

前調

有感

東風似客醉裏落花南又北客似東風攜手斜陽一笑中
佳人怨我不寄江南春一朶我怨佳人憔悴江南不似春

前調

臘望初晴月佳甚有上元花柳意不能忘情

臘銷三五月向雪山雲外吐烟水黃昏梅柳依稀笛斷
魂今宵豫賞便作香塵隨步想莫待元宵燈火零星
雨寂寥

前調

乙亥
上元

無燈可看雨水從教正月半探蠶推盤探得千秋字字
看銅駝故老說著宣和似天寶五百年前曾向杭州
看上元

前調

庚辰
送春

送春待曉春是五更先去了我醉方知春正憐伊怕別
伊留君不可歸到海邊方憶我做盡花歸欲贈君時
少一枝

前調

尚學林己丑壽旦適歸廬陵其
先世相州人居永和今家臨川

相州錦好待到相州人已老潁水歸田白鷺驚猜已十
年太師尚父晚遇明時方用武大笑相逢把酒家鄉
是客中

前調

自述

不能管得欲雨能教天地黑待得開晴不用吾言也自行一杯亦醉萬事無能吾欲睡舊亦能詩說舊時詩問是誰

前調

再用韻戲
古岩出妾

清歡昨日十事不如人六七試數從前素素相從得幾年子兮子兮再棟一枝何處起翠釜峽客好其如良夜何

前調

壽詞

脾神喜樂壽酒一杯勝服藥過却明朝頭上新霜也合
銷小春三日便覺春暄梅影出醉把梅看比似茱萸
更耐寒

山花子

春暮

東風解手即天涯曲曲青山不可遮如此蒼茫君莫怪
是歸家 闔闔相迎悲寂苦英雄知道鬢先華更欲徘徊
春尚肯已無花

此處情懷欲問天相期相就復何年行過章江三十里

淚依然 早宿半程芳草路猶寒欲雨暮春天小小桃
花三兩處得人憐

柳梢青

春感

鐵馬蒙氈銀花灑淚春入愁城笛裏番腔街頭戲鼓不
是歡聲 那堪獨坐青燈想故國高臺月明輦下風光
山中歲月海上心情

南歌子

搔困麻仙爪含暄忍客衣夜長牕月露成幃不說明朝

風雨自當歸

菊熟雙投美香飄一縷絲霜前鴈到蟹螯持自試小牕
醉墨作新詩

朝中措

酒勸

鍊花為露玉為瓶佳客為頻傾耐得風霜滿鬢此身合
是金莖 牆頭竹外洞房初就畫閣新成嚼得梅花透
骨何愁不會長生

太常引

和香巖
上元韻

便晴也似不曾晴不怕金吾禁行風雨動鄉情夢燈火

揚州化城 少年跌宕誰家嬌小繞帶到天明昨夜月

還生但驚破霓裳數聲

時夜月蝕

前調

壽李同知

此公去暑似新秋吏毒毒一勾勾行縣勝監州覺隨車
甘雨應求 鷺清為酒螺清為壽起舞祝君侯急召也
須留廿四考中書到頭

玉樓春

侯仲澤約飲螺山靈泉寺余與鄧中甫侯久欲暮歸歸而侯至寺相失

霜風不動晴明好探梅有約城東道橋邊失卻老仙期
城門落日人歸早野田一望迷衰草除是騰空君後
到立馬三周黛佛頭參差中路令人老

前調

乙酉
九日

龍山歌舞無人道只說先生狂落帽秋風亦是可憐人
要令天意知人老菊花不為重陽早自受古人詩句
惱與君鄭重說殘年殘年惟有重陽好

烏夜啼

初
夏

猶疑薰透簾櫳是東風不分留花更勝一春紅
新雨
過綠連空蝶飛慵閒過綠陰深院小花濃

前調

秋中

素娥醉語曾留又中秋待得重圓誰妬兩悠悠
向愁
早今愁水沒中洲看取明朝晴去不須愁

前調

何年似永和年記湖船如此晴天無處望新煙
江南

女裙四尺合歡韁

北粧短後露髻
秋十合面並起

昨日老人曾見久潛

然

行香子

和北客問梅
白氏長安人

雪履無痕溪影傳神著坡詩請自清溫

松風
亭韻

朝朝朝不去

惜惜空勤似夢中雲雲外雪雪中春四野昏昏匹馬

巡巡揀一枝寄與芳尊更誰興到於我情真是白家賓

江南路隴頭人

前調

次草牕憶
古心公韻

玉立風塵光動黃銀便談文也到夜分無人燭下壁上

傳神記老婆心寒士語道人身 極意形容下語難親

更萬分無一分真醉翁去後往往愁人顧滴山泉銜丘
塚化龍雲

前調

疊韻

海水成塵河水無銀恨幽明我與公分青山獨往回首
傷神歎魏闕心磻石魄汨羅身 除却相思四海無親

識風流還賀季真而今天上笑謫仙人但病傷春愁厭

雨淚看雲

公嘗謂余仙風道骨不特文字為然
故屢著之不敢忘草窻其族子也

前調

梅探

月露吾痕雪得吾神更荒寒不傍人溫山人去後車馬
來勤但夢朝雲愁暮雨怨陽春說著東昏記著南廵
淚盈盈檀板金尊憐君素素念我真真歎古來言新樣
客舊時人

品令

聞鶯

滿庭芳草更昨日落紅如掃綠陰政似人懷抱一聲
曉春色何曾老幸自不須人起早寂寞如相惱舊時

聞處青門道禁烟時候柳下人家好

鵲橋仙

題陳敬之扇

乘鸞著色癡蠅誤拂不及羲之醉墨偶然入手送東陽
便看取薰時清適清風去暑閒題當日宰相紗籠誰
識封丘門外定何人這一點瞞他不得

前調

壽臞仙母

看人擲果看人罷織難得團圓七夕蟠桃只在屋東頭
慶西母年開八袞去年今日今年今日添箇曾孫抱

膝人間樂事有多般算此樂人間第一

前調

自壽
二首

輕風澹月年年去路誰識小年初度橋邊曾弄碧蓮花
悄不記人間今古吹簫江上霑衣微露依約凌波曾
步寒機何意待人歸但寂歷小窻斜雨

天香吹下煙霏成路颯颯神光暗度橋邊猶記泛槎人
看赤岸苔痕如古長空皓月小風斜露寂寞江頭獨
步人間何處得飄然歸夢入梨花春雨

一剪梅

和人
催雪

萬事如花不可期
花不堪持
酒不堪持
江天雪意使人迷
剪一枝枝歌一枝枝
歌者不來
今幾時
姜影無詞
張影無詞
不歌不醉
不成詩歌也
遲遲雪也
遲遲

前調

和教秋厓為小
孫三載壽謝

人生總受業風吹
三歲兒兒八十兒兒
深閨空谷把還持
啼看人知啼怕人知
客中自種綠猗猗
月下橫枝雪下橫
枝尊前百歲且開
著今歲今時前歲
今時

夜飛鵲

夕七

何曾見飛渡年又年癡今古相望猶疑朱顏一去似流水
斷橋魂夢參差何堪更嗟遲暮聽旁人說與此夕佳期
深深代籍盼悠悠北地臘脂誰寄揚州破鏡遍海角
天涯空待人歸自小秦樓望巧吳機迴錦歌舞為誰
星萍耿耿算歡娛未省流離但秋衾夢淺雲間曲遠薄
命同時

疎影

催雪

香篝素被聽花犯低低瑤花開未長記那時熾炭圍爐
瘦妻換酒行試黨家人在銷金帳約莫是打圍歸際又
誰知別憶烹茶冷落故家愁思聞道滕驕吳懶今朝
待撒與翻雲須易白白不成又不教晴做盡黃昏情味
銀河本是冰冰底怎忍向東風成水待滿城玉宇瓊樓
却報卧廬人起

摘紅英

賦花朝
月晴

花朝月朦朧別朦朧也勝簷聲咽親曾說令人悅落花

情緒上墳時節 花陰雪花陰滅柳風一似千秋掣晴
未決晴還缺一番寒食滿村啼鴉

千秋歲

和尚學林
壽筵即席

新筍熟也借問誰家早梅影裏蜂兒繞三更殘月上一
夜霜天曉溪橋小春風有意年年到 當年青鳥去落
葉無人掃銅柱仄瑤池老殘鐘長樂樹墜馬咸陽道空
回首御街人賣南京棗

捉拍醜奴兒

辛巳
除夕

送歲可無詩得團藥忍不開
暑不記去年今夕夢江東
懷抱江西信息舍北妻兒
五十歲度炊待五十富貴
成癡百年苦樂乘除看今年
一半明年一半更似兒時

前調

有感

世事莫尋思待說來天也應悲
百年已是中年後西州
垂涕東山攜手幾個斜暉
也莫苦吟詩苦吟詩待有
誰知多少不是無才氣文時
不遇武時不遇更說今時

最高樓

壽秋水

銀河水洗得世間清
山色雨餘青
老子綸巾
綦別墅人
家
麤睡折秋城
定誰勞
定誰福
定誰能
常恨著景升
兒不似
又恨著景升
牛小耳空
相望愧平生
我欲臨風
扶玉樹
自攀承
露酌金莖
看昆明
鱗石長海桑
晴

前調

壬辰壽王
城山八十

朱頂字八十正平頭
添作八千休
無能也
自收鄆
塢到
今恨不貶潮州
看幾人
炎又冷
老還羞
也不學太公
忙把火
也不學申公
輪轉磨
休莫莫
休休小遲授業

何曾吃更遲食乳不須愁且從容某水釣某丘遊

前調

和詠雪

非是雪祇是玉樓成屑不盡雲英東邊老樹頽然折西
頭穉柳爆然聲試平安松丈丈竹兄兄 有誰向金船
呼小玉又誰憐紙帳夢飛瓊怪疎影墜娉婷喚起老張
寒蕞蕞好歌白雪與君聽但黨家人笑道太麤生

前調

和再

花上雪信手捻來成屑不就瓊英昨朝已見詩成卷今

朝又試曲成聲更催催莫不做水僊兄
終須待晴時
攜斗酒更須待老夫吟數首休更疊疊娉婷已無翠鳥
傳花信又無羯鼓與花聽更催催遲數日是春生

桂枝香

寄揚州馬觀復時新舊侯交惡
甚思去年中秋泛月感懷離言

吹簫人去但桂影徘徊荒杯承露東望芙蓉縹緲寒光如注
去年夜半橫江夢倚危檣參差曾賦茫茫角動回舟盡興未
驚鷗鷺情知道明年何處漫待客黃樓塵波前度二十
四橋頗有杜書記否二三子者今如此看使君角巾東路

人間俯仰悲歡何限團圓如故

臨江僊

代賀丞相兩國夫人生日並序

甲子之秋九月吉日大丞相國公壽母兩國
太夫人初度謹上小詞用獻為王母三千年
之曲

丞相衮衣朝戲綵年年慶事如新尊前一笑共兒孫人
間傳壽酒天上送麒麟 縹緲祥烟連北闕天顏有喜
生春蓬萊清淺海光平今年初甲子重試碧桃根

前調

壽劉教

聞道城東鶴會欣然一笑乘風不知一鶴在墻東神仙
人不識未始出吾宗弟子有年於此先生之道如龍
碧桃花子落壺中化為三五粒元是北邊松

前調

壬午七夕

天際何分南與北五更縱又成橫夜來拾得斷河星化
為一片石持去問君平老大看天一笑兒童問我須
應向來牛女本無名要知天上事亦似謗先生

前調

將孫生日賦

二十年前此日女兄慶我生兒
替萱弄綵聽孫啼典衣沽美酒
數待冠婚時亂後飄零獨在紫
荆墓棘風吹尊前萬事莫尋思
兒童看有子白髮故應哀

前調

賀軒

舊日詩腸論斗酒風流懷抱如
傾幾年不聽渭城聲尊前無賀
老卷裏少彌明聞說語言都好
便應步履全輕長生第一是風
僧額前書八十能說又能行

前調訪梅

西曲冒衣迷去路雪銷斷岸無痕尋花不擬到前村暖
風初轉袖小徑忽開門却憶臨塘橋下馬古心舊居暗香不
是黃昏人生南北與誰論嶺梅花樹下閒聽蜜蜂喧

前調謝友人

老去尚呼張丈醉中自惜熊兒越王臺上鷓鴣啼三朝
臣不遇無復好文時情緒幽幽似結鬢絲索索禁吹
病來魂不到相思散人腰已散倚杖嘆吾衰時苦腰滯

前調

晴曉

海日輕紅通似臉
小窓明麗新晴滿
懷著甚是真情不
知春睡美為愛曉寒輕
說似吳山樓萬疊
雪銷未盡
宮城湖邊柳色漸啼鶯
纔聽朝馬動一卷賣花聲

前調

有感

過鴈天邊信息兩宮池上
心情沈思海角憤難平
山風欺客夢耿耿到天明
幸自不爭名利閒愁夜夜如驚
明朝鬢白兩三莖
世人都不要似汝復何成

睡過花陰一丈愁深酒力千鍾夢魂不得似遊蜂瓶花
無密約到處自神通 天上西湖似錦人間嬌馬如龍
今年不與去年同飄零終不恨難與故人逢

前調

午端

幸自不須端帖子閒中一句如無愛他午日午時書惟
應三五字便是辟兵符 久雨石鯨未沒小風紈扇相
踈邀朋一笑共菖蒲去年初禁酒今日漫提壺

適滿城
無酒酤

去年此日
初賣官酒

前調

坐悟

我去就他甚易他來認我良難悟時到處是壺天古詩
尋一句危坐看香烟 金玉滿堂不守菁華歲月空遷
從今飽飯更安眠丹經都不看閒坐一千年

前調

辛巳端午和
陳簡齋韻

舊日采蓮羞半面至今回首匆匆夢穿斜日水雲紅癡
心猶獨自等待鄭公風 海上頽雲潮不返側身空墮
遼東人間天上幾時同宮衣元不遇無語醉醒中

前調

閒居感舊

昔走都門終夜雨
明朝泥淖堪驚疎
疎點點忽雞鳴數
峯青似染快活早來晴
十五年間春夢斷
亂山寒食清明無人挑菜
踏青行青鳩啼雨外閒聽
寺中聲

鷓鴣天

九日

白白江南一信霜
過都字不到衡陽
老嘉破帽并吹却
未省西風似此狂
攀北斗酌天漿
月香滿似菊花黃
神仙暗度龍山劫
鷄犬人間百戰場

前調壽康教

白髮平津起衰然燕飛定遠望生還世間最有團樂樂
又是平平過一年銀信近玉鞭先東來西去爵銜鱣
人生有命遲遲好且喜稱觴壽母前

前調

壽趙松廬

占得春風五日先至今住處是開元寫真若遇丹元子
只著當時宮錦船松戴雪自蒼然八公花下少如前
看來天上多辛苦且住人間五百年

前調

和謝胡盤居
取橘為壽

自入孤山分外香
南枝不改舊時粧
為曾盤裏承青眼
一見溪頭道勝常
高山樂又相羊
上方不復記傳觴
橘中箇箇盤深窈
依倚東風局意長

前調

春迎

去年太歲田間土
明日香烟壁下塵
馬上新人紅又紫
眼前歌妓送還迎
釵頭燕勝金紉燕
歌趙舞動南人
遺民植杖唐巾起
閒伴兒童看立春

前調

立春後
即事

舊日桃符管送迎燈毬爆竹闌先羸鹿門亂走團欒久
纔到城門有鼓聲梅弄雪柳窺晴殘年猶自冷如冰
欲知春色招人醉須是元宵與踏青

前調

贈妓

暖逼疎枝漸漸融雙飛誰識蝶雌雄歌聲已逐行雲去
花片偏來酒琖中
暑月冷畫樓空酒闌猶未見情鍾
直須把燭穿花幃方見佳人玉面紅

青玉案

微晴渡觀桃非復前日彌望之盛獨可
十數樹耳蓋以此間人摘實之苦自伐

去也歸途悄然念
之作此以示同行

稠塘舊是花千樹曾泛入溪深誤前渡劉郎重喚渡漫
山寂寂年時花下往往無尋處一年一度相思苦恨
不拋人過江去及至來時春未暮兔葵燕麥冷風斜雨
長恨稠塘路

前調

用辛稼軒
元夕韻

雪消未盡殘梅樹又風送黃昏雨長記小紅樓畔路杵

歌串串鼓聲疊疊豫賞元宵舞 天涯客鬢愁成縷海
上傳柑夢中去今夜上元何處度亂山茅屋寒爐敗壁
漁火青熒處

前調

壽老登八十六歲
戊午六月十七日

里中上大人誰大人上大仁難作八十六翁閒處坐小
生懶惰近來高臥忘却今朝賀 甲申還是連珠磨剩
有老人星一箇白髮朱顏堪婆娑靈光殿火昆明劫過
角綺園黃我

前調

暮春
旅懷

無腸可斷聽花雨沈沈已是三更許
如此殘紅那得住
一春情緒半生羈旅寂寞空山語
霖鈴不是相思阻
四十平分猶過五漸遠不知何杜宇
不如歸去不如歸
去人在江南路

踏莎行

雨中觀
海棠

命薄佳人情鍾我輩海棠開後心如碎
斜風細雨不曾晴
倚闌滴盡胭脂淚
恨不能開開時又背春寒只了

房櫳閑待他晴後得君來無言掩帳羞憔悴

前調

上元月明無燈
明日霰雨屢作

壁彩籠塵金吾掠路海風吹斷樓臺霧無人知是上元
時一夜月明無著處早是禁烟朝來凍雨東風自放
銀花樹雪晴須有踏青時不成也待明年去

前調

九日牛
山作

日月跳丸光陰脫兔登臨不用深懷古向來吹帽挿花
人盡隨殘照西風去老矣征衫飄然客路炊烟三兩

人家住欲携斗酒荅秋光山深無覓黃花處

北望蝶山西迷鳳苑匆匆醉裏題詩滿黃花只似去年

黃去年人去黃花遠

謂周秋陽同登雲騰

雨壓城荒丘園路斷

却暗又恨公來晚依稀自唱古人詩明年此會知誰健

前調

松偃成陰荷香去暑過溪似是東林路不知宿昔有誰
來寺門同聽催詩雨北馬依風涼蟬咽暮城門半帶
東陵圃江南不是米元暉無人更盡滄洲趣

前調

櫻桃詞

珠靨相於燕脂同傳樊家更共誰家語梢頭結取一春
愁玉簫不會雙雙侶風送流鶯前歌後舞並桃欲吐

含來住雙飛燕子自相銜會教唇舌調鸚鵡

李商隱詩
流鶯猶故

在爭得
諱含來

燭影搖紅

嘲王槐城
獨賞無月

老子婆婆那面也上南樓去素娥有恨隱雲屏元是嬌
癡故鵲扇徘徊未許耿多情為誰堪訴使君愁絕獨倚

闌干後期無據 有酒如船片雲掃盡霓裳露他時與
客更携魚猶記臨臯路
余前夜船酒觴客月明槐城登樓余不及赴月暗殊敗興 因
念南羈北旅醉烏烏憑君楚舞問君不見璧月詞成樓
西沈處

前調

丙子中秋泛月

明月如冰亂雲飛下斜河去旋呼艇子載簫聲風景還
如故嫋嫋予懷何許聽尊前嗚嗚似訴近年潮信萬里
陰晴和天無據 有客秋風去時留下金盞露少年終

夜奏胡笳誰料無歸路同是江南倦旅對嬋娟君歌我
舞醉中休問明月明年人在何處

前調

立春日雪
和秋崖韻

春日江郊素娥吹下銀幡舞東風點點亂茶烟留到明
朝否掩袖凝寒不語漫粘酥枝枝縷縷斷腸何似飛絮
多時落梅深處仙掌擎來翠眉斂半看成露驚沙馬
上面簾輕誰貴甌盧主多少高陽伴侶到如今沈冥幾
許乘槎相問萬里銀河欲歸無路

念奴嬌

槐城賦以自壽又和韻見壽三和謝之

先生自壽擁衾寒重賦凌雲遊意我有大兒孔文舉弱冠駸駸暮齒桃已三偷樹猶如此前度花開幾蓬萊可塞還童却老無計為此援筆翩翩大江東去好似歌頭起寄與兩家孫又子長看以文為戲某所某公同年同月誰剪招魂紙前三例好不須舉後三例

槐城廿一日生

枯寒生晚復何似張緒少年時意薄命不逢何至此滿眼啼粧鵲齒城是城非年來年去萬八千能幾半癡半

了更癡兒計孫計 回首仕已半生仕何如己己矣羞
拈起幸有橘丸九日大且復從公圍戲若論彈文更書
謗篋吾歷無餘紙多年致仕大都有甚恩例

吾年如此更夢裏猶作狼居胥意千首新詩千斛酒管
甚何侯侯齒負嶠波翻瀛洲塵敗吾屐能消幾經丘尋
壑是他早計遲計 猶記辰己嗟嗟故人賀我且勉呼
君起五十不來來過二方悟人言都戲以我情懷借公
篇韻恨不天為紙餘生一笑不須酈曼容例

前調

和臞仙用槐
城韻見壽

滄洲一葉徒借君回我爐亭春意突兀靈光無立壁八
面江風寒齒響屐廊深籠門檻赤數月今纔幾千年未
論豈無數十年計我本高卧墻東何知人事推枕為
君起憔悴庚寅何足記不覺聯翩賓戲白雪陽春黃鸝
唱日絕少澄心紙我歌草草和章有例還例

前調

酬王
城山

兩九日月細看來也是樊籠中物點點山河經過了拔

幟幾番殘壁白是沙堤蒼然吳楚一片成羶雪此時把
酒舊詞還是坡傑歌罷公瑾當年天長地久柳與梅
都發幾許閒愁斜照裏掌上漚生漚滅滄海桑枯東陵
瓜遠總不關渠髮簪花起舞可憐今夕無月

乳燕飛

王朋益僉事夜坐文江之上屢稱赤壁之遊樂酒餘索賦因取坐間語參差述之

赤壁之遊樂但古今風清月白更無坡作矯首中州公
何許共我橫江孤鶴把手笑孫劉寂寞頗有使君如今

否看青山似我多前卻幾見我伴清酌 江心舊豈非

城郭撫千年桑田海水神遊非昨對影三人成六客

皆坐

間語更倚歸舟夜泊尚聽得江城愁角渺渺美人兮南浦

耿余懷感淚傷離索天正北繞飛鵲

前調

壽周耐軒

曾授茅山記共當年二百七十又三甲子昨上雲臺占

雲物占得景風南至又恰是封侯千歲行遍神州河洛

外早歸來庭下槐陰翠萬戶共生意 溪翁圖是參

同契想金丹圓成功行活人相似顧我尊前歌赤壁生
子當如此耳笑華髮東坡年幾弟不如人今老矣看龍
頭霄漢雌龍尾呼白石為公起

前調

飲海棠花下說放翁記劍南宣華園日報
開及幾分聞五分亟往因美放翁記此足
為後人開遊賞之趣蓋花開三日色變五日則
後半開者盛先半開者落矣歌述此意使觀者

省有

遇雨城西路看輕雲弄日花開微寒如霧誰是宣華門
守者報我十分開五便痛飲能消幾度寄語後來看花

客待看花莫待開成樹成樹也半為土 伶巢蜀錦今

何許記西湖聚景村庄

韓侂胄村庄今名聚景

王亭謝墅冷落柯

丘二三子更問何園韓圃悄一笑回車竹所

東坡自柯丘賞海棠

復過何氏韓氏詩云竹間老人不讀書留我閉門誰教汝蓋市人好事者也適過某氏園園閉因記羲之嘗造竹主人主人避不見其子獻之肩輿入人園復為驅出回車竹所併記其父子賓主一笑 點點守宮

包紅淚縱傾城一顧傾城顧家國事政何與

瑞鶴仙

壽翁丹山

正丹翁初度對此滿江城曉鶯欲語崆峒在何處漸雨

過農郊勸耕問路州人爭覩問坡老重來是否把看燈
傳說風流八境畫圖新句如許老子文章揮毫立馬
脫鞵嫌汙太平易作聽父老歌襦袴願使君小住五風
十雨重見一粳三黍又天邊飛詔殷勤說相將去

高陽臺

和吳
吾韻

雨枕鶯啼露班燭散御街人賣花窠過眼無情而今魂
夢年多百錢曳杖橋邊去問幾時重到明河使人間無
了東風此恨難磨落紅點點入頽波任歸春到海海

又成渦江上兒童抱茅笑我重過蓬萊不漲枯魚泪但
荒村敗壁懸拔對殘陽往往無成似我蹉跎

聲聲慢

九日泛湖遊壽樂園賞菊
時海棠花開即席命賦

西風墜綠喚起春嬌嫣然困倚脩竹落帽人來花艷乍
驚郎目相思尚帶舊子甚淒涼未收粧束吟鬢底伴寒
香一朶並簪黃菊却待金盞華屋園林靜多情怎禁
幽獨蛺蝶應愁紅日落紅難觸那堪鴈霜漸重怕黃昏
欲睡未足翠袖冷且莫辭花下秉燭

欽定四庫全書

集部
須溪集卷九

詳校官庶吉士臣張溥

主事臣呂雲棟覆勘

謄錄貢生臣吳士英

欽定四庫全書

須溪集卷九

宋 劉辰翁 撰

詞

漢宮春

壬午開爐
日戲作

雨入輕寒但新筇未試荒了東籬朝來暗驚翠袖重
倚屏幃明窓麗閣為何人冷落多時催重頓粧臺側畔
畫堂未怕春遲漫省茸香粉暈記去年醉裏題字傾
歌紅爐未深乍暖兒女成團茶香疎處畫

音畫

殘灰自說

心期容膝好團樂分芋前村夜雪初歸

前調

歲盡得樊吾寄
溪南梅相憶韻

疎影橫斜似故人安道只在前溪年年望雪待月漫倚
吟磯千紅萬紫到春來也是尋思君不見永陽江上殘
梅冷雨絲絲有幾情人似我漫騎牛卧笛亂揀繁枝
市門索笑憔悴便作新知城樓畫角又無花只落空悲
但傳說壽陽一片何曾迎面看飛

洞仙歌

壽中
甫

也曾海上啖如瓜大棗海上歸來相公老畫堂深滿引
明月清風家山好一笑塵生蓬島 六年春易過贏得
清陰到處持盃藉芳草看明年此日人在黃金臺上早
整頓乾坤事了但細數齊年幾人存更宰相高年幾人
能到

前調

器之高誼取前月青山洞
仙歌華子重壽走筆謝之

有客從余不計余無酒袖有蟠桃為君壽歎此桃再熟
也須年後甚辦得轉盼箇偷桃手 菊潭三十斛月又

月添天賦先生日更久但黃楊長寸閏年倒寸似恁得
到梧宮甚時候客又道奇特是陽生後七日相看入春
風柳

齊天樂

端午
日韻

枝頭雨是青梅淚翻作一江春水魚腹魂消龍舟叫徹
不了湖亭張戲滿庭芳芷正艾日高高葛風細細試比
陳人人間除我更誰似浮沉君共我里記薰廊待對
聞雞蹴起昨日蟾蜍明朝蠅虎身與渠衰更悴老夫病

已任采綠采苓為師為帝但有昌陽倩酤扶路醉

前調

節庵和示中齋端午齊天樂詞有懷其弟海山之夢昨亦嘗和中齋此韻感節庵此意復

不能自己儻見中齋及之

海枯泣盡天吳淚又漲經天河水

猶有淚成河經天復東注杜子美懷弟妹

也語萬古魚龍雷收電卷宇宙剎那間戲沉蘭墜正想重

整荷衣頓驚腰細尚有干將衝牛射斗定何似成都
橋動萬里歎何時重見鷓啼人起孤竹雙清紫荆半落
到此吟枯神瘁對牀永已但夢繞青神塵昏白帝重反

離騷衆醒吾獨醉

前調

戊寅登高即席和秋崖韻

蔣陵故是簪花路風煙奈何秋暑候館凋梧宮牆斷柳
誰識當年倦旅予懷何許想上馬人扶翠眉愁聚舊日
方回而今能賦斷腸語登高能賦最苦歎高高難問
欲望迷處蝶繞東籬鴻翻上苑那更畫梁辭主來今
往古漫湛輩同來遠公回去

是日共二僧登華蓋

我醉安歸黃

花扶路舞

江城梅花引

辛巳洪都上元

幾年城中無看燈夜三更月空明野廟殘梅村鼓自春
聲長笑兒童忙踏舞何曾見宣德棚不夜城去年今
年又傷心去年晴去年曾不似今年閒坐處却不曾行
憶去年人彈燭淚縱橫想見西窓窓下月窓下月是無
情是有情

前調

相思無處著春寒傍闌干濕闌干似我情懷處處憶臨

安想見夜深村鼓靜燈暈碧為旁人說上元是花是
雪無意看雨摧殘雨摧殘探春未還到春還似不如閒
感恨千般憔悴做花難不惜與君同一醉君不見銅雀

臺望老瞞

時隣居聲伎
有物化之感

蘭陵王

丁丑感懷和
彭明叔韻

雁歸北渺渺茫茫似客春湖裏曾見去帆誰遣江頭絮
風息千年記當日難得寬閒抱膝興亡事馬上飛花看
取殘陽照亭驛哀拍願歸骨悵悵何匹漣酪何食

相思青塚頭應白想荒墳酹酒過車回首香魂携手抱
相泣但青草無色語絕更愁極漫一番上聲青青一番
陳跡瑤池黃竹哀離席約八駿猶到露桃重摘金銅知
道忍去國忍去國

前調

丙子
送春

送春去春去人間無路鞦韆外芳草連天誰遣風沙暗
南浦依依甚意緒漫憶海門飛絮亂鴉過斗轉城荒不
見來時試燈處春去最誰苦但箭雁沉邊梁燕無主

杜鵑聲裏長門暮想玉樹凋土淚盤如露咸陽送客屢
回顧斜日未能度春去尚來否正江令恨別庾信愁
賦二人皆北去蘇堤盡日風和雨歎神遊故國花記前度人
生流落顧孺子共夜語

瑣窓寒

和巽吾
聞鶯

嫩綠如新嬌鶯似舊今吾非故空山過雨曉曉留春春
去似尊前曲曲陽關行人回首江南處漫停雲依黯征
衫憔悴酒痕猶污欲語渾未住記匹馬輕行風林煙

樹家山何在想見綠窓啼霧又何堪滿目淒涼故園夢
裏能歸否但數聲鶯驚覺行雲重省佳期誤

歸朝歡

最是一人稱好處昨日小春留得住梅花信信望東風
須待公歸香滿路年時今已度長是巴山深夜雨宣又
召凱還簇簇要見壽觴舉掃盡窩蜂間繡斧疊鼓春
聲歡歲暮燕臺劍履趣鋒車銀信低低傳好語紫貂裘
脫與肘印累累映三組但重省西來斗水忘却愛卿取

大聖樂

傷春
有序

予嘗愛古詞云休眉鎖問朱顏去也還更來
麼音韻低黯辭情跌宕庶幾哀而不怨有益
於幽憂憔悴者然二語外率鄙俚因依聲仿
彿反之和之此曲少有作者流為善歌則或
數十疊其聲皆不可考今特以意高下未必
盡合本調聊以紓思志感云爾

芳草如雲飛紅似雨賣花聲過況回首洗馬塍荒更寒

食宮人斜閉煙雨銅駝提葫蘆何所得酒泥滑滑行不
得也哥哥傷心處斜陽巷陌人唱西河天下事不如
意十常八九無奈何論兵忍事對客稱好面皺如鞞廣
武噫嘻東陵反覆歡樂少分哀怨多休眉鎖問朱顏去
也還更來麼

寶鼎現

春月

紅粧春騎踏月花影牙旗穿市望不盡樓臺歌舞習習
香塵蓮步底簫聲斷約彩鸞歸去未怕金吾呵醉甚輦

路喧闐且止聽得念奴歌起
父老猶記宣和事抱銅
仙清淚如水還轉盼沙河多麗
滉漾明光連邸第簾影
凍散紅光成綺月浸葡萄十里看往來神仙才子肯把
菱花撲碎
腸斷竹馬兒童空見說三千樂指等多時
春不歸來到春時欲睡又說向燈前擁髻暗滴鮫珠墜
便當日親見霓裳天上人間夢裏

祝英臺近

水後

昨朝晴今朝雨渺莽遽如許
厭聽兒童總是漲江語是

誰力挽天河誤他僊客并失却乘槎來路
斷腸苦剪燭深夜巴山酒醒聽如故
勃窣荷衣墮淚少乾土從初錯鑄鴟夷
不如歸去到今此欲歸何處

前調

席間詠
繡毬

看師師成蝶蝶感盡不成疊欲試搔頭花重乍堪捻是
誰拋過東牆今無赤鳳夢得似那人身捷
年時臘曾笑梅梢和月蠶豆忽如莢便向龍門無復釧金接待教
開到瓊林閔僊重見又誰念昆明前劫

憶舊遊

和吳吾相
憶寄韻

渺山城故苑煙橫綠野林勝青油甚相思只在華清泉
側凝碧池頭故人念我何處墮淚水西流念寒食如君
江南似我花絮悠悠不知身南北對斷煙禁火蹇六
年留恨聽鶯不見到而今又恨睨睨成愁去年相攜流
落回首隔芳洲但行去行來春風春水無過舟

唐多令

丙子中秋前聞歌此詞者
即席借蘆葉滿汀洲韻

明月滿滄洲長江一意流更何人橫笛危樓天地不知

興廢事三十萬八千秋
落葉女牆頭銅駝無恙不看
青山白骨堆愁除却月宮花樹下塵埃莽欲何遊

前調

風露小瀛洲斜河到海流
人間塵不到瓊樓錯向五陵
陵上望幾回月幾回秋
落日大湖頭垂虹今是不醉
尊前往往往成愁便有扁舟西子在無汗漫與君遊

前調

寒雁下荒洲寒聲帶影流
便寄書不到紅樓如此月

明如此酒無一事但悲秋
萬弩落潮頭靈胥還怒
不滿湖山猶是春愁欲向湧金門外去煙共草不堪
遊

前調

日落紫霞洲蘭舟穩放流玉虹仙如在黃樓何必錦
袍吹玉笛聽欸乃數聲秋
赤壁舞濤頭周郎還到
不倚西風嫋嫋予愁喚起橫江飛道士來伴我月中
遊

前調

龍洲曲已八九和復為中齋勉
強夜和中有數語醉枕忘之

零露下長洲雲翻海倒流素娥深不到西樓忽覺斷潮
歸去也飲不盡一輪秋城外土饅頭人能飲恨不古
人不見使吾愁莫有橫江孤鶴過來伴我醉中遊

前調

丙申
中秋

明月滿河洲星河帶月流料素娥獨倚瓊樓竟是何
年何藥誤魂夢冷不禁秋少日夢龍頭知君猶夢
不算虛名不了閒愁便有鵲袍三萬萬應不是舊京

遊

前調

殘日下瓜洲平安火似流月高高掛古城樓回首少
年真可笑無一事又悲秋天在海邊頭天風有意
不結桂枝嫋嫋余愁不是銀河無去路先不去後難
遊

前調

癸未上
元午晴

春雨滿江城汀洲春水生更愁人雨似春醒猶有一

般天富貴夜來雨早來晴
年少總看燈老來猶故
情便無燈也自盈盈說著
春情誰不愛今夜月有人
行

虞美人

丹詠壯

空明一朵揚州白紅紫銷無色
是誰喚作水晶毬惹
起高燒銀燭上元愁
去年一捧飛來雪不似渠

千葉狂風一蹴過秋千
憔悴玉人和淚望嬋娟

水晶毬

天香國色辭脂粉肯愛紅衫嫩
脩然自取玉為衣似是

銀河水皺織成機 寒欺薄薄春無力月浸霓裳濕一

窩香雪世間稀可惜不教留到賜衣時

白疊
羅

壽安樓子重重藥少見如魚尾向來染得渭脂紅又自

細搖花浪動春風 賴鱗似是人誰信但向殘紅認若

教隨水去悠然為報沙頭玉鷺莫貪鮮

魚尾
壽安

花心定有何人捻暈暈如嬌靨一痕眉月老春宵政似

酥冑潮臉不曾銷 當年掌上開元寶半是楊妃爪若

教此掐到癡人任是高牆無路蝶翻身

一捻
紅

前調

詠海棠

無花敢與姚黃比對對鴛鴦起識他金帶萬釘垂誰向
麒麟揎裏却猴緋潛溪以上難為說自是君恩別後

來西子避無鹽又道君王捉鼻有何嫌

公服紫

魏家品是君王后豈比昭容袖風吹滿院繡囊香誰賜
大師師號退昭陽飛霞一落無根蒂空墮重華淚離

披正午盛時休閒為思王重賦洛神愁

御愛紫

猶疑綠萼花微甚難與青蓮並青蓮朶朶是天人又向

天人想見洛陽春
多情素質塵生步
况被潘妃汚
此花仍是色微頰
却是嬌波波外兩眉青

青蓮
夢

前調

客中
送春

樓臺烟雨朱門悄
喬木芳雲杪
半窓天曉又聞鶯
比似當年春盡最關情
客中自被啼鶻惱
况落春歸道
滿懷憔悴有誰知
猶記湧金門外送人時

前調

城山堂
試燈

黃柑擘破傳香霧
新酒如清露
城中也是幾分燈
自

愛城山堂上兩三星
枝頭未便風和雨
寂寞無歌舞
天公肯放上元晴
自是六街三市少人行

前調

揚州賣鏡上元事也用前韻

徐家破鏡昏如霧
半面雲間露
等閒相約是看燈
誰料人間天上似流星
朱門簾影深深雨
憔悴新人舞
天涯海角賞新晴
惟有橋邊賣鏡是閒行

黃簾綠幕窓垂霧
表立如承露
夕郎偷看御街燈
歸奔河邊殘點亂如星

時余坐爐亭六日禮數內同舍誘余竊出觀燈亟歸

開園

蔣李

二官者

遊春雨蛺蝶穿人舞如今煙草鏤春晴併

與蘇堤葛嶺不堪行

前調

大紅桃花

鞦紅乾色無光霽須是鮮鮮翠脩然一點繫裙腰不
著人間金屋恐難消英英肯似馬支貴漫脫紅霞
帔落時且勿浣塵泥留向天台洞口泛吾詩

前調

壬午中秋雨後不見月

濕雲待向三更吐更似沉沉雨眼前兒女意堪憐不說

明朝後日說明年

今年十七望

當年知道晴三鼓便似佳

期誤笑他拜月不曾圓只是今朝北望也凄然

前調

用李後主韻二首

梅銷臘盡春歸了畢竟春寒少亂山殘燭雪和風猶勝
陰山海上客羣中年光老去才情在惟有華風改醉
中幸自不曾愁誰唱春花秋葉淚偷流

情知是夢無憑了好夢依然少單于吹盡五更風誰見
梅花如淚不言中兒童問我今何在煙雨樓臺改江

山畫出古今愁人與落花何處水空流

前調

春晚

輕衫倚望春晴穩雨壓青梅損皺綃池影泛紅蕉看取
斷雲來去似爐煙愁春來暮仍愁暮受却寒無數年
來無地買花栽向道明年花信莫須來

前調

花品

娟娟二八清明了猶說淮陽早錢歐陸譜徧花光紅到
壽陽也不說淮陽此花地望元非薄回首傷流落

洛陽間歲斷春風怎不當時道是洛陽紅

前調

中秋對月

秋陰團扇如人老漸近中秋好新涼還憶小樓邊自在
一窓明月傍人眠多情誰到星河曉只道圓時少他
年幾處與君看長是成愁成恨不成歡

戀繡衾

宮中吹簫

燕脂不浣紫玉簫認宮中銀字未消但鳳去臺空古比
落花無第二朝天涯流落哀聲在聽烏烏不似內嬌

漫身似商人婦泣孤舟長夜寂寥

前調

或送肉色
牡丹同賦

困如宿酒猶未消滿華堂羞見目招忽折向西隣去教
旁人看上馬嬌肉色似花難可得但花如肉色妖嬈
誰說漢宮飛燕到而今猶帶臉潮

前調

已卯燈夕留城中獨坐憶當
塗買燈姑蘇夜舞再集賦此

當年三五舞太平醉歸來花影滿庭辨永夜重開宴
笑姑蘇萬眼未明萬眼羅最精
最貴然最暗而今繞市歌兒馬客

黃昏細雨滿城十年事去如水想家人村廟看燈

花犯

舊催雪詞苦不甚佳因復作此

海山昏寒雲欲下低低壓吹帽平沙浩浩想關塞無煙
時動衰草蘇郎卧處愁難掃江南春不到但悵望雪
花夜白人間憔悴好誰知廣寒夢亡慘丁寧白玉
鍊不闌懷抱看清淺桑田外塵生熱惱待說與天公
知道期臘盡春來事宜早更幾日銀河信斷梅花客
易老

前調

再和
中甫

甚天花紛紛墜也偏偏著余帽乾坤清皓任海角荒荒
都變瑤草落梅天上無人掃角吹吹不到想特為東皇
開燕瓊林依舊好看兒貪耍不知寒須塑就玉獅
置兒懷抱奈轉眼驚何在淚痕成惱白髮翁翁向兒
道那曲巷素安愛晴早便把似一年春看惜花花
自老

酹江月

北客用坡韻
改賦訪梅

冰肌玉骨笑嫣然總是風塵中物誰掃一枝流落到

絕域高臺素壁匹馬南來千山萬水為訪林間雪淵

明愛菊不知誰是花傑

陶詩謂菊為霜下傑

憔悴夢斷吳山有

何人報我前村夜發蠟屐霜泥煙步外轉入波光明滅雪

後風前水邊竹外歲晚華予髮帶花人去江妃空弄明

月

前調

趙氏席間即事再用坡韻

四無誰語待推窓初見江南風物索笑巡簷無奈處悄

隔東鄉一壁有酒如船招呼滿載只欠枝頭雪疎花冷
眼坐中都是詞傑堪恨幾日西郊尋消問息肯向
吟邊發著意相看又恐是六出幻成還滅懊恨兒童
攀翻頂戴不到先生髮明朝重省初三知屬誰月

前調

和朱約山自壽
曲時壽八十四

五朝壽俊筭生年占得淳熙四四三萬六千三萬了
剩有一千饒底三百年間和風麗日幾箇能消此約
山山笑先生不負山矣今歲甲子重陽待重數五

百十三甲子吟萬首詩更自和歲歲壽詩自喜若
比路公如今年紀猶是平章事先生撫掌問他閒
日能幾

前調

同舍延平林府教製新詞祝
我初度依聲依韻還祝當家

西湖處士例一枝團月咸平印印千古詩宗傳不絕
至竟被渠道盡雪返香魂霜吹曉怨肯受東君聘羅
浮夢轉兔環知是誰子未說煙雨江南垂垂青
子須要調金鼎愁絕溪山明秀處依舊鶴南飛影

我白君玄君詞我和各自為長慶後來桃李遙遙別是花信

前調

五日 和尹存吾時
北人競驚洲渡

棹歌齊發江雲暮吹得湘愁成雨小酌千年知他是
阿那年時沉午日落長沙風回極浦黯不堪延佇吳
頭楚尾非關四面為楚幾度喚起醒纍淋漓痛飲
不學愁予句踏鯉從龜胥濤上怎不化成龍去越女
吳船燕歌趙舞世事悠悠許明朝寂寂雙雙飛下

鳴鷺

前調

怪梅一枝為北客載
酒移寘盆中偉然

歲寒相命算人間除了梅花無物窺宋三年又不是草
草東隣鑿壁偃寒風前沉吟竹外直待天驕雪白家
人至一枝橫出終傑寂寞小小疎籬探花使斷知

復何時發北驛不來春又遠只向窓前埋滅好在冰
葩著些風篠怎不清余髮補之去後墨梅又有明

月

北人著小竹
花間更好

前調

漫興

遙憐兒女未解憶長安
十年前月徙倚桂枝空延佇
無物同心堪結冷落江湖蕭條門巷猶著西樓客
李舍人班舊節齋吳客嘗言賞中秋之盛恨無鐵笛一聲吹裂山石休

說起舞登樓那人已先我渡江橫楫圓缺不銷青塚
恨漠漠風沙如雪西母長生素娥好在何皓當時髮
山河如此月中定是何物

前調

中秋彭明叔別
去赴永陽夜集

團團桂影怕人道大地山河裏許舊日影娥池未缺驚
斷霓裳歌舞雪白長城金明古驛盡是乘槎路少年白
髮自無八駿能去猶記流落荒濱故人相遇共吹

簫前度無酒無魚空此客昨夜留之不住睡起披
衣行吟坐對又有重圓處不知今夕那人有甚佳
句

前調

中秋待月

城中十萬有何人和我烏烏鳴瑟對影姮娥成三

處誰料尊中無月剪紙吹成長梯摘取兒戲都堪惜
洞庭夜白一聲聊破空濶休說二十四橋便一分
無賴有誰曾識一枕秋衾南北夢好好娟娟成雪舊
日少遊錦袍玉笛醉卧藤陰石蕭然今夕無魚無酒
無客

滿江紅

海棠下歌後
村詞共扣

淡淡燕支似褪向景陽鴛石依然是睡春未足捧心
猶癖籍甚不禁君再顧嫣然却記渠初拆黯銷魂

欲盡更堪憐終難得 猶幸是卿卿惜空復見誰誰

摘但當時一笑也成陳迹我嬾花殘都已往詩朋酒
伴猶相覓聽連宵又雨又還晴鳩鳴寂

前調

古岩以馬觀復遣舟約予與中
齋和後村海棠韻復寄述懷

何許相求且不是南溫北石也欲學絕交高論自陳
余癖萬里魚書長記憶十年波浪傷離折筭此舟
不是剡溪舟空回得 非出處何須惜非瑕額何須
摘看雪銷鴻去有何留跡安石豈無同樂意玄真不

是朝廷覓但眼前真率斲相違歌聲寂

前調

鶯語依然但春去人間無約誰念我吟情憔悴醉魂
落魄盡日只將行卷續有時自整殘棋著向黃昏細
雨悶無寥青梅落南又北相思錯朝異暮人情薄
漫躊躇在目奢華如昨海底月沉天上兔遼東人化
揚州鶴記龍雲波浪豈能平天難託

平聲滿江紅

壽某翁

十歲兒童看騎竹花陰滿城與新第桐鄉孫子高下
齊生歌枕不尋柯下夢舉頭自愛橘中名但有時米
價問如何公助平東西塾聽書聲長短卷和詩成
總神仙清福前輩家庭試問凌煙圖相國何如洛寺
寫耆英甚天公屬意富民侯銀信青

八聲甘州

和汪士安海棠下先歸前是
觀挑水東至其鄉真常觀

問海棠花下又何如玄都觀中遊歎仝巢蜀錦常時不
數前度何稠誰見宣華故事歌舞簇遨頭共是西江

水不解西流 在處繁華如夢夢占人年少生死堪
羞任傾城傾國風雨一春休醉逢君何須有約醉留君
繫不住扁舟空又失花前一笑綠盡芳洲

前調

和鄧中甫中秋

看團團一物大如杯時復幾何秋俯天涯海角今來
古往人物如流想見霓裳歌罷無物與澆愁惟有當
時樹香滿瓊樓 誰念南樓老子倚西風塵滿心
事悠悠便班姬袖裏明月一時休歎年年吹簫有約

又一番鶴夢雪堂舟池上久滿身風露還索衣裘

前調

賀詞

記前朝鶴會又重來攀翻第三桃看雲華授策麻姑
擘脯羸女吹簫尋思曲江舊事宮錦勝龍標奏罷清
華夢獨立春宵不數相州錦樣是調羹御手重解
金貂但今年此日疎了醉葡萄聞老僊衣冠皓偉又
丁寧天語著兒招都人望回班賜第赤舄飛朝

前調

和蕭汝道感秋

但秋風年又一年深不禁長年悲自景陽鐘斷館娃
宮閉冷落心知千樹西湖楊柳更管別人離看取茂
陵客一去無歸 都是舊時行樂漫煙銷日出水遶
山圍看人情荏苒不似鷓鴣飛聽砧聲遙連塞外問
三衢道上人去人稀銷凝久殘陽短笛似我歡歎

前調

送春
韻

看飄飄萬里去東流道伊去如風便錦纜危潮青山御
宿煙雨啼紅愁是明朝酒醒聽著返魂鐘留得春如故

了不關懷 春亦去人遠矣是別情何薄歸興何濃但
江南心好未便到芙蓉念今夜初程何處有何人垂袖
舞行宮青青柳留君如此如此匆匆

前調

春雪奇麗未能賦
也因右巖韻志喜

甚花間兒女笑盈盈又添雪獅成任踏青無路凌波有
地步步光塵招得梅妃魂也好似去年春柳亦何曾
絮都是雲英 休道東皇誕漫

退之語

到茶煙歇後誰

濁誰清賴謝娘好語端勝解圍兵看昨天公雨粟定

大家快活社翁平春晴好溶溶雨盡聽賣花聲

水龍吟

寓興和
吳吾韻

何須銀燭紅粧菜花總是曾留處流觴事遠繞梁歌斷
題紅人去繞蝶東牆啼鶯修竹疎蟬高柳歎一春風雨
歸來抱膝懷往昔自淒楚遙望東門柳下夢參差
欲歸幽路斷紅芳草連空積水憑高墜霧雨洗銅駝
天清華表昇平重遇但相如老去江淹才盡有何
人賦

前調

壽周耐軒

多年袖辦心香重新拈出為公壽喚起老龍如今政是
欠伸時候弱語聞鶯輕陰轉柳絃薰未透信江南自
有真儒未用須待見袞和繡聞說鋒車在道更四
輩傳宣來驟蟠胸何限天門夜對春宮晨奏梅子陰
濃菖蒲花老桔槔閒後但北闕下澤遺民社在賀公
歸晝

前調

看人削樹成槎布颿海上秋風浪白頭坡老知津水
手倚枕榔杖九點齊州半生髀肉煙塵莽蒼但北
窓夢轉青陰滿眼撫陳迹玩新漲 世事艱難已徧
笑而今不堪重想龍筋虎骨根深伏兔擎空千丈禮
樂文章終須夢卜南人為相問凌煙生面他時髣髴
似何人像

前調

和清江李侯
士弘來壽

閒思十八年前依稀正是公年紀銅駝陌上烏衣巷

口臣清如水是處風箏滿城畫錦兒郎偉偉但幅巾
藜杖低垂白鬢角與綺問何里最憶他年甘旨也
曾經三仕三已至今結習餘年未了業多生綺安得
滕廬移將劉棹長薰晉鄙望福星炯炯西江千里待
公來社

前調

和南劍林同舍
元甲遠寄壽韻

多年綠幕黃簾瓶花黯黯無誰主荀陳跡遠燕吳路
斷何人星聚四聖樓臺水僊華表冷煙和雨但裴徊

夢想美人不見空猶記鐵爐步 過盡涼風天未墮

華箋行行飛翥一端翠織錦鯨茅屋天吳驚舞

時林寄被

禮顯為

念我何辰涸陰冰子生憐金虎恨兒癡不了山川

悠緬共君鬢宇

前調

巽吾賦溪南海棠花下有相憶之句讀之不可為懷和韻並述江東旅行

征衫春雨縱橫何曾濕得飛花透透知君念我溪南徒
倚誰家紅袖藉草成眠簪花倚醉狂歌扶手歎故
人何處聞鶉墮淚春去也到家否 說與東風情事

怕東風似人眉皺亂山華屋殘隣廢里不堪回首寒
食江村牛羊丘壠茅簷酤酒笑周秦來往與誰同夢
說開元舊

前調

和中甫
九日

孤煙澹澹無情角聲正送層城暮傷懷絕似龍山罷
後騎臺沉處珠履三千金人十二五陵無樹歎岐王
宅裏黃公壚下空鼎鼎記前度幾許英雄文武酒
不到故人墳土平生破帽幾番搖落受西風悔昨日如

今明年此會偶然懷古便東籬甲子花開花謝不堪重數

燕春臺

壽周耐軒

五十三年韶華剛度今年夏五十三瑞鶴朝來待
公彌月重探人生貴壽多男看爛斑室添箇荷衫
亭亭八面醉倚紅酣承平故事暇日清談雲龍
風虎塞北江南午橋午枕羲皇白日如快手種
蟠桃明年看取實大如柑奈何堪天妬人睡美趣

趣朝參

掃花遊

和秋厓見壽秋厓
時謁選留詞去

春臺路古想店月潭雲雞鳴關候巾車爾久記湘纍
降日留詞勸酒不是行邊待與持盃論斗筭吾壽已
待得河清萬古晴晝京國事轉手漫宮粉堆黃
髻粧啼舊瑤池在否自劉郎去後宴期重負解事天公
道是全無又有浯溪友笑浯溪至今聲叟

憶江南

二月十八日臚仙約客因問晏氏
海棠開未即攜具至其下已盛甚

花幾許已報八分催却問主人何處去且容老子箇中
來花外主人回年時客如今安在哉政喜錦官城爛
漫忽驚花鳥使推頽世事只添杯

時有稱宣使折花者蓋託也託以肆陵慢也

梅花引

壽槐城

酒熟未梅開未去年遲待重來醉笑當筵舞當筵惟
有今年八十是開年參差野袂成歸鶴石鼎
未開容剝啄歲開尊歲添孫孫又開尊福曜萃高
門

蝶戀花

感興

過雨新荷生水氣高影參差無謂思量睡夢裏不知
輕別意醒來竟是誰先起去路夕陽芳草際不論
關干處處情懷似記得分明羞擲藥自知不是天
僂子

前調

壽李侯

八九十翁嬉入市把菊簪萸共說新筍美何以祝
公千歲歲壽潭自酌花間水白鷺沉沉飛復起

杜老江頭不恨秋風裏欲種鰭根天上李三千年看
青青子

霓裳中序第一

石瑤林作霓裳中序第一詠
溫泉疑其未嘗親見語不甚

切予所見廬山一兩池初不可近漸入
頗覺奇賞因用其聲用其韻試為之

銀河下若木暖漲一川春霧綠白鳳徘徊清淑似沉
水無煙畧湯千斛柔肌暗粟想臨流嬌噴輕觸空恨
恨何人熱惱却憶冷泉掬 酥玉未諳湯沐深又淺
蕩搖心目雲蒸雨漬翻覆泛影浮紅飄飄自相逐裳衣

還未欲薦自怪野鴛雙浴華清遠寒猿夜繞落月可
能灑

瑞龍吟

和王聖
與壽韻

老人語曾見昨日開爐墜天花否生年不合荒荒枯根薄
命嬋娟余誤那知許女樂如煙點點江南處處何時
重到湖船淋漓載酒依稀弔古終待臘脂露掌弄鷗
招鶴憑君畫取萬柳漫堤一絲一淚垂雨濛濛絮裏又
送金銅去漫腸斷王孫望帝嘔心囊句市隱今成趣袖

回地狹天吳鳳舞莫是青州譜怎不早翩翩向青州住
回頭蜃海已沉花霧

滿庭芳

和鄉帥
自壽

千騎家山一觴父老前有韓魏公來青原上已纔見壽
筵開歐公雲間還見憶相州更自遲回公知否福星分
野飛騎不須排 留春亭下草雪霜過了依舊春芳
待留春千歲日醉千杯却怕催歸丹詔棟明堂須要
雄材趨朝去西風便面隻手障浮埃

前調

草窓老仙歌滿庭
芳壽予勉次原韻

空谷無花新筍有酒去年窮勝今年蛩吟蛩和且省費
蠻牋聞說先生去也江南岸縛草為船依然在山棲寒
食路斷却歸屨老人三又兩清風作供晴日生煙但
高高杜宇不辨行纏幾度披衣教我二升內煮石燒鉛
休重道玉龍無孔夜夜叫穿天

木蘭花慢

別雲屋
席間賦

午橋清夜飲花露重燭光寒約處處行歌朝朝買酒

典却朝衫尊前自堪一醉但落紅枝上不堪安歸去柳
陰行月酒醒畫角聲殘王官難得似君閒閒我見君
難記李陌看花光陰冉冉風雨番番相逢故人又別送
春歸叙日萬重山江上愁思滿目離離芳草平關

前調

和中甫李參
政席上韻

自崆峒麥熟耕犢滿桔槔閒笑吾黨清談長衣櫛具
更進賢冠倉皇庇公宇下便秋風江上不驚寒雪夜
入三城易槐陰護一家難東山零雨幾時還領客

竹林間看滿座空尊輕裘緩帶綠鬢朱顏風流一笑
余事定碑金無恙庾家完又賦南烹初食明朝飡玉
何山

永遇樂

予自乙亥上元誦李易安永遇樂為之
涕下今三年矣每聞此詞輒不自堪遂
依其聲又托之易安自喻
雖辭情不及而悲苦過之

璧月初晴黛雲遠澹春事誰主禁苑嬌寒湖堤倦暖
前度遽如許香塵暗陌華燈明晝長是嬾攜手去誰知
道斷煙禁夜滿城似愁風雨宣和舊日臨安南渡芳

景猶自如故綰帙流離風鬟三五能賦詞最苦江南無
路鄜州今夜此苦又誰知否空相對殘缸無寐滿村
社鼓

前調

予方痛海上元夕之事鄧中甫適和易安詞至遂以其事弔之

燈舫華星崖山矴口官軍圍處壁月輝圓銀花焰短春
事遽如許麟洲清淺鰲山流播愁似汨羅夜雨還知
道良辰美景當時郭下僊侶而今無奈元正元夕
把似月朝十五小廟看燈團街轉鼓總似添惻楚傳

柑袖冷吹麝漏盡又見歲來歲去空猶記弓彎一句
似虞兮語

內家嬌

壽王城山

結客少年場攜高李聞笛賦游梁看漢水淮山高樓
共卧融尊鄭驛飛蓋相望春風裏種他紅與白笑我
嬾中忙供奉後來玄都桃改佳人好在庾嶺梅香

何處最難忘會稽歸鬢晚空帶吳霜贏得黃冠野
服笑傲羲皇看花外小車出長生洞橘中二老鬪智

瓊黃稱壽堂添十字孫認三房

六州歌頭

乙亥二月賈平章似道督師至太平州魯港未見敵鳴鑼而潰後半月聞

報賦

向來人道真箇勝周公燕然眇浯溪小萬世功再建隆
十五年宇宙宮中鴈堂中伴鬪虎鼠搏鷄雀覆蛇龍
鶴髮龐眉憔悴空山久來上東封便一朝符瑞四十
萬人同說甚東風怕西風

都人竊議者稱西頭

甚邊塵起漁陽

慘霓裳斷廣寒宮青樓杳

都城籍妓皆隸歌舞無敢犯

朱門悄鏡

湖空裏湖通

葛嶺瞰裏湖無敢過

大纛高牙去人不見港重重

斜陽外芳草碧落花紅拋盡黃金無計方知道前此
和我但千年傳說夜半一聲銅何面江東

六醜

春感和彭明叔韻

看東風海底送落日飛空如擲醉遊暮歸怕西州墮
策歸路偏失記上元時節千門立馬望金坡殘雪素
娥推下團團轍塞草驚塵河水渡楫悠悠雨絲風拂
但相隨斷雁時度荒澤 回頭紫陌夢歸歸未得惟

悴江南秋風舊客去年說著今日漫故人相命玳筵
鳴瑟愁汗漫金林杯窄况飄泊相遇當時老叟梨園
歌籍高歌為我幾回闌似子規落月啼聲悄傍人淚
滴

百字令

李雲岩先生遠記初度手寫去年赤壁
歌歲晚寄之少賤不敢當也匆匆和韻

寄長鬚去儻以
可教則教之

少微星小撫劍氣橫空隱見林杪夜來宋都如雨更安
得奇哉慄皎

佛以四月八生見明星悟道曰
奇哉即左傳星隕如雨之夕也

予女三齡

覽余初度一語占先兆暮年喜見甲申聚五星照

堪歎亡國餘民老人孺子爾汝霜橋曉騎馬聽雞朝

寂寞夢入南枝三繞洛社耆英行窩真率著我真

堪笑與公試數開禧嘉定寶紹

公開禧丁卯生僕生紹定之六年壬

辰相望二十六歲云

前調

壽陳靜山少吾一歲

洞房停燭似新歲數到上元時節一釂屠蘇千歲酒
添得新人羅列昨日迎長今朝獻壽賞團圓佳月永

和春好用之不竭嘉客

聞其新造酒永和鎮百石

見說海上歸來

有如瓜大棗無人分得六十二三劉夢得輸與香山樂
色菱谷二綃楊枝春草歌舞琵琶笛祇愁元日玉龍催

上金驛

鷓鴣啼序

感懷

匆匆何須驚覺喚草廬人起筭成敗利鈍非臣逆睹
至死後已又何似采桑八百看蠶夜織小窓裏漫二
升自苦教人弔卧龍里別有佳人追桃恨李擁凝

香繡被爭知道壯士悲歌蕭蕭政度寒水問荆卿田橫
古墓更誰載酒為君酹過霜橋落月老人不見遺履
置之勿道逝者如斯甚矣衰久矣君其為吾歸計為耕
計但問某所泉甘何鄉魚美此生不願多才藝功名馬
上兜鍪出莫書生誤盡了人間事昔年種柳江潭攀
枝折條噫嘻樹猶如此登高一笑把菊東籬且復
聊爾耳試回首龍山路斷走馬臺荒渭水秋風沙河
夜市休休莫莫毋多酌我我在最喜高歌去但高歌

不是番腔底此時對影成三呼蛾起舞為何人喜

前調

悶如愁紅著雨卷地吹不起便故人渺渺相逢前事欲
語還已凝望久荒城落日五湖四海煙浪裏問而今
何處寄聲舊時隣里閒說那回海上蘇李雲深
夜如被想攜手漢天不語叫叫不應疑水待河梁一
尊落月生非死別君如酹望故人閣上依稀長劍方
履古人已矣垂名青史謂當如此又誰料浮沉自

得魚計賞心樂事良辰景美撞鐘舞女朱門大第雕
鞍駿馬番裝笠笑虛名何與身前事區區相望餓死
西山懸目東門人生何樂為此 古人已矣天下英
雄使君與操耳聽喔喔雞鳴早起屢舞徘徊痛飲高
樓狂歌過市蒼蒼萬古義農周孔文章事業星辰上
到而今枯見銀河底笑他黃紙除君紅旗報我為君
助喜

前調

趙宜可以余譏其韻
苦心改為之復和之

愁人更堪秋日長似歲難度相攜去晚晚登高高極政
犯愁處常是恨古人無計看今人癡絕如許但東籬
半醉殘燈自修菊譜歸去來兮怨調又苦有寒蟬予
賦湖山外風笛闌干胡床夜月誰據恨當時青雲跌
蕩天路斷險艱如許便橋邊賣鏡重圓斷腸無數

是誰玉斧驚墮團團失上界樓宇甚天誤嬋娟予誤
悔却初念不合夢他霓裳楚楚而今安在楓林關塞
回頭憶著神仙處漫斷魂飛過湖江去時時說與地上

羣兒青瑣瑤臺閬風縣圃 琵琶往往凭鞍勸酒千

載能胡語歎自古宮花薄命漢月無情戰地難青故
人成土江南憔悴荒村流落傷心似失梨園部渺空
江淚隔蘆花雨相逢司馬風流濕盡青山欲歸無路